

## DOMENIE VI DI PASCHE

### Antifone di jentrade cf. Is 48,20

Cun vôs di gjonde contait e fasêtu savê;  
fasêtu rivâ fin ai ultins confins de tiere:  
il Signôr al à liberât il so popul, aleluia.

Si dîs Glorie a Diu.

### Colete

Diu onipotent, danus di celebrâ cun cûr e passion  
chestis zornadis di gjonde in onôr di Crist resurît,  
par podê mostrâ in ogni moment de nestre vite  
ce che o stin fasint memorie.

Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE At 10,25-27.34-35.44-48

Il don dal Spirtu Sant al ven jù ancje parsore dai pagans.

Dai Ats dai Apuestui

Al capitâ che, tal moment che Pieri al jentrave [te cjase di Corneli], chest i lè incuintri e si butà in zenoglon denant di lui par adorâlu. Ma Pieri lu alcà sù e i disè: «Jeve sù po, che ancje jo o soi un om compagn di te». E cjacarant cun lui al jentrà in cjase, là che si intivâ intun biel trop di int e ur disè: «Mi stoi propit sancirant che il Signôr nol fâs preferencis cun nissun e che in ogni part di mont al à agrât chel che lu tem e al pratiche la justizie».

Pieri nol veve nance finît di dî chestis robis, cuant che il Spirtu Sant al vignì parsore di ducj chei che a scoltavin la peraule. E i fedéi Judeus, che a jerin vignûts cun Pieri, si davin di maravee che il don dal Spirtu Sant al fos vignût jù ancje parsore dai paians. Che di fat ju sintivin a fevelâ altris lengthis e a laudâ Diu. Alore Pieri al disè: «Si puelial mo dineâur l'aghe dal batisim a di chei che a àn vût il Spirtu Sant compagn di nô?». E al ordenà di batiâju tal non di Jesù Crist. Po dopo lu prearin di restâ cualchi dì cun lôr.

Peraule di Diu.

### SALM RESPONSORIÂL dal Salm 97

R. Il Signôr al à palesade ai popui la sô justizie.

O ben:

R. Aleluia, aleluia, aleluia.

Cjantait al Signôr une cjante gnove,  
parcè che al à fatis robonis.

Lu à fat vinci la sô diestre,  
il braç de sô santitât. R.

Il Signôr al à palesade la sô salvece,  
in face di ducj i popui al à pandude la sô justizie.  
Si è visât dal so boncûr,  
de sô fedeltât pe cjase di Israel. R.

Ducj i confins de tiere a àn viodule  
la salvece dal nestri Diu.

Che i cjanti al Signôr dute la tiere,  
berlait, scriulait cu lis cjantis plui legris. R.

## SECONDE LETURE 1 Zn 4,7-10

Diu al è amôr.

De prime letare di san Zuan apuestul

Miei cjârs, volânsi ben un cul altri, parcè che l'amôr al ven di Diu: chel che al vûl ben al nas di Diu e al cognòs Diu. Chel che nol vûl ben nol à cognossût Diu, parcè che Diu al è amôr. In chest si è palesât l'amôr di Diu par nô: Diu al à mandât il so unic Fi tal mont par che nô o vessin la vite midiant di lui. In chest al sta l'amôr: no sin stâts nô a volêi ben a Diu, ma al è lui che nus à volût ben a nô e al à mandât so Fi tant che vitime par parâ jù i nestris pecjâts.

Peraule di Diu.

## CJANT AL VANZELI Zn 14,23

R. Aleluia, aleluia.

Se un mi vûl ben, al metarà in pratiche la mêm peraule,  
al dîs il Signôr,  
e gno Pari i volarà ben e li di lui o vignarìn a stâ.

R. Aleluia.

## VANZELI Zn 15,9-17

Nissun nol à un afiet plui grant di chel che al dà vie la sô vite pai siei amâs.

Dal vanzeli seont Zuan

In chê volte, Jesù al disè ai siei dissepui: «Come che il Pari mi à volût ben a mi, cussì jo us ài volût ben a vualtris. Restait tal gno amôr. Se o metarêts in pratiche i miei comandaments, o restarêts tal gno amôr, come che jo o ài metûts in pratiche i comandaments di gno Pari e o resti tal so amôr. Us ài dit chest par che la vuestre gjonde e sedi dentri di vualtris e la vuestre gjonde e rivi al colm.

Chest al è il gno comandament: che si voledis ben un cul altri, come che jo us ài volût ben a vualtris. Nissun nol à un afiet plui grant di chel che al dà vie la sô vite pai siei amâs. Vualtris o sêts miei amâs se o fasêts ce che us comandi. No us clami plui servidôrs, parcè che il servidôr nol sa ce che al fâs il so paron. Us ài clamâts amâs, parcè che dut ce che o ài sintût di gno Pari us al ài fat cognossi. No sêts stâts vualtris a sielzimi me ma o soi jo che us ài sielzûts vualtris e us ài metûts par che o ledis e o produsedis e il vuestri prodot al resti, par che dut ce che i domandarêts al Pari tal gno non us al dedi. Al è chest il gno comandament: che si voledis ben un cul altri».

Peraule dal Signôr.

Si dîs O crôt.

## Su lis ufiertis

Che a rivin fin li di te, Signôr,  
lis nestris preieris dutune cu lis ufiertis,  
in mût che, smondeâts midiant de tô gracie,  
o sedin plui disponûts ai misteris dal to grant bonvolê.  
Par Crist nestri Signôr.

## Antifone a la comunion Zn 14,15-16

Se mi volêts ben, o metarêts in pratiche i miei comandaments,  
al dîs il Signôr.

Jo o prearai il Pari e lui us darà un altri Confuartadôr,  
di mût che al sedi cun vualtris par simpri, aleluia.

## Daspò de comunion

Diu onipotent e eterni,  
che cu la resurezion di Crist tu nus ricreis pe vite eterne,

fâs cressi in nô i benefizis dal sacrament di Pasche  
e rinfuarce i nestris cârs cun cheste mangjative di salvece.  
Par Crist nestri Signôr.